

LOCAL
BON DIA

Aruba

Mañan lo ta eleccion di Mosa Cultural



Eleccion di Mosa Cultural 2013 dedica na nos Aña Nacional di Papiamento.



ORANJESTAD - Centro di Bario Brazil conhuntamente cu comision Mosa Cultural 2013 orguyosamente ta presenta "Eleccion di Mosa Cultural 2013" dedica na nos di 10 aña di oficialisacion di nos dushi idioma papiamento.

E actividad ta tuma luga di asabra awo dia 24 di augustus 2013, cuminsando pa 8'or di anochi na Centro di Bario Brazil.

Participantenan di tur bario a uni pa representa nan districto, na unda nos a cera conoci cu e candidatanan cu ta señoranan cu hopi curashi y dinamismo, cu ta trece informacionnan hopi valioso di nos cultura na e publico presente. E participantenan pa aña 2013 lo ta na encargo di: Sra.

Marcia Kock representando "Danza Aruba", Sra. Ludwina Geerman representando "Nos Cultura", Sra. Jarmin Acosta representando "Rosea Cultural", Sra. Rosie Albertsz representando "Colegio Cristo Rey" y por ultimo Sra. Sigrie Ras representando "Nos Cosecha" y nan ta trahando hopi duro pa duna pueblo di Aruba un excelente presentacion.

Preparacion di e Mosanan tabata tin como tarea pa investigacion y historia, e folklore y e tradicion di nos cultura di Aruba, como tambe nan tabata tin mester a asisti na diferente charla di cultura, bishita diferente Museo, como tambe nos Parke Nacional Arikok pa asina aki, nan por cera conoci cu parti di nos Patrimonio Nacional y siña di dje, pa di e forma aki nan por haya caminda pa cana y yega na un concepto pa cu nan presentacion.

E Mosa Cultural eligi lo keda encarga cu e parti di educacion di nos folklore y cultura, specialmente pa cu nos hobennan. Tambe nan tin mester asisti na diferente eventonan cultural y ademas e Mosa ganado lo representa e cara di e cultura Arubano.

E anochi lo cuminsa cu un



grandioso apertura dedica na nos di 10 aña di oficialisacion di nos dushi idioma Papiamento na unda nos ta conta cu participacion di e hoben talentoso, Sta. Gabriela Krozendijk y tambe lo ser lansa oficialmente e Himno di Mosa Cultural titula: "Mosa Di Mi Alma" cual lo ta un composicion di Sr. Freddy Montoya cu ta forma parti di e comision como representante di Departamento di Cultura Aruba y e areglo di e cancion lo ta den man di e musico profesional: Sr. Danny Koolman, tema cu a wordo graba pa Ivan Quandus.

E programa ta continua na unda cada Mosa lo trece un presentacion espectacular como resultado di nan investigacion riba aspecto di nos folklore y di nos cultura.

Bin presencia un tremendo eleccion, na unda no necesariamente beyesa sino cultura ta ser refleha den cada un di e participantenan. Nos ta premira un anochi grandi, na unda nos cultura y folklore lo ser resalta grandemente.

No laga hende conta bo, bin wak pa bo mes y alabes duna un contribucion na cultura, bo cultura, nos cultura...!

Mosa Cultural 2012, Sra. Jerisa Lejuez, Sr. Mariano Ber-



mudez, hunto cu Comision Eleccion Mosa Cultural, Den nomber di Centro di Bario Brazil, ta desea na cada un di e candidatanan p'e Eleccion di Mosa Cultural 2013, hopi exito. □

